

Jü Carta San Perota Guosa Huëpo Jiojtekähui

Teboteri

1 ¹Ínapo Simon Peero, Jesucristota sáuhuëhui éntok ápostol áapörík bétana yeu púari, enchimmeune jiojte, eme jume ito beu itom Dios itom jínëukame Jesucristota lütüría béchïbo huaka Diostat ehuamta tua musäla machik jájamlame. ²Huä Diosta tü eäü éntok yánti jápsihuame chëhuasu enchimmet ayunake Diosta éntok itom Señor Jesústa enchim täyakä béchïbo.

Jume Diosta jápsi jípureme

³Sïme hua jápsihuamta bétana huéeme, éntok Diostau huátihüä bétana huéeme itom miiki áapörík Diosta úttearammea hua ä ujjóriay éntok yörisi machiku ay itom núnukamta itom täyakä béchïbo, ⁴huámëi huämi buéresi musäla machik itou nätua, huäri huam Diosta bénasi enchim jápsinakë béchïbo, huaka ím ániapo yore jápsi nasontemta takahuata jita ukulëu béchïbo ayukamta tójj-lataka. ⁵Íäri béchïbo eme két át jiápseka tekipanuanake,

enchim ä sülëhuem tü éerita rúktia, jü tü éeritau éntok jítat jünee huamta, ⁶jítat jünee huamtau éntok emo yüihuamta, emo yüihuamtau éntok yánti jápsihuamta, yánti jápsihuamtau éntok Dios huátihuamta, ⁷Dios huátihuamtau éntok sailapo emo huatiahuame, emo huátiahuamtau entok yore nákuamta.

⁸Bueituk íkái enchimmet ayuak éntok jíba enchimmet ä yötui, kaibem kía jápsina, kaita joaka, jíbem tekipanuanake itom Señor Jesucristota chëhuasu enchim täyanakë béchïbo. ⁹Të hua sïme íkái kaa jípureme hua kaa mékka bíchamta bénasi maachi; líptita bénasi maachi, bueituk huaka bannaataka kaa ä tühua yáarim bétana ä tü huéchilatukäu kóptiala. ¹⁰Huäri béchïbo, hermanom, tuem át jiápseka tekipanua Diosta enchim núnutukä bétana éntok enchim yeu púatuakä bétana enchim ä lütüría yáanakë béchïbo; bueituk ínel anëtekem jauhuey júnem kaa huáttinake. ¹¹Bueituk junëli jíbem buéresi al-leriahuaka mabetna,

áman huaka itom jínëukamta itom Señor Jesucristota yü nésahuepo.

¹²Íäri béchïbo, ínapo jíba enchim áu huáatitua, enchim ä jüneriay junne, éntok huaka lútüriata én enchim jïpurëubet útteata enchim nülatuk junne. ¹³Ino béchïbo türi, én takahuapo aneka enchim ín búsanakëhui enchimneu nokaka; ¹⁴jünéaka lauti íkã takahuata ín tö simnakëhui, itom Señor Jesucristota nee jüneetuápo ámani. ¹⁵Ínapo két át jíápseka tekípanuanake, chúkula nee muksuko íahüi enchim huáatinakë béchïbo.

Jume Cristota ujyória bíchakame

¹⁶Bueítukte itom Señor Jesucristota útteara bétana enchimneu nookak éntok júchi ä yebijnakeu bétana, të kaa kía nokta árai huápo áman yáata nokaka, ál-la huaka ä yörisi máchiraata itom pusímmea itom bíl-latukápo ámani. ¹⁷Bueítuk áapörík jü Dios Áchayta bétana yöríhuamta éntok ujyóriata mabetak áman buere ujyóriata bétana jáhui áu kóm bíttuahuak ínel jíaka: “Íri ájária jü ín Üusi ín nákéhui; áapo jü tua nee al-leetuakame.” ¹⁸Itapo éntok íkãí jáhuita jíkkajak téhueka bétana kóm bíttuahuakamta, áman káuhui santo ti téhuaahuakapo áamak aneka.

¹⁹Atä jípure kétchi jume profeetam nooki, të én chë lútüriapo tahualata. Türi enchim béchïbo enchim át suähui hua nokichi hua machiria kaa

machiku béetemat enchim suä bénasi, machiriata yeu kíktëu tájti éntok Jesucristota enchim jíapsita machiriäu tájti, hua buere chóki matchuu bíchaa yeu hueramame ti téttehuaahuame. ²⁰Tem bát íkãí jüneria, kía jita noki júne profetam bétana huémta jïjoteripo ayukamta kaa yoremta éäpo áachä jüneenakëhui, ²¹bueítuk kía jauhuey júne profetam noki kaa yoremem éäpo nokhuak, ál-la jume yoremem Diosta yeu púarim Espiritu Santota éäpo áman nookak.

Profetam ára nókichim éntok maestrom ára nókichim

(Judas 4-13)

2 ¹Të két bannaataka jume profeetam ára nókichiram aaney Israelta yoremraata násuku, maestrom ára nókichiram enchim násuk annákë bénasi, huame kaa jünakiachisi tábuik enchim majtianakeme, hua tua lútüriata bétana huémta tatabbáreka. Señorta am jínëukamta jünem kaabë tíanake, junëlim läutipo huaka kaitápo bem tahuanake emo jariuria. ²Éntok juebénaka huaka kaa tühuata bem majtiahuakau jonake. Júmëi béchïbo jü tü nooki Jesucristota bétana huéeme jájana át noknake. ³Éntok tómita buéresi bem huáatiä béchïbom ára nókichiatu enchim majtiaka enchim ä úhuaanake. Huámechïri béja jauhuey naateka béttesi nokta ámet chúpatunakeu kaa bínhuatunake, juka jiokot máchiraata bem bínnakëhui,

bem kaitäpo tahuanakeu jíba yúmanake.

⁴Bueituk Dios huame ángelesim Dios bejrita yáakame kaa am jiokorek, ál-la béetekum kómam guötiak huam kaa machiku pereesopo am tójjak, hua taahuari ámet nokta chúpanakeu tájti. ⁵Éntok juka yoremraata bannaataka huémta júne kaa jiokorek, Noéta jíbba, huaka lútüriata bétana nokäuta éntok guoy búsaním áamaki; huame juéna yórememueu buere bániata, diluvio téamta, bíttuak áma am kókkko íaaka. ⁶Alè bénasi huame pueblom Sodoma éntok Gomorra nokta ámet chúppak am luutinakè béchíbo, náposasi am tahuariaka, éntok ejemplo am yétchak, huame kaa tühuata jo báareme béchíbo. ⁷Tè juka tü yórem Lotta áma yeu huíkkkek, huaka juéna yóremem kaa huéeläpo juénasi bem anëubei kaa al-leamta. ⁸Bueituk í tü yóreme áme násuk jóakay chíkti táapo ä jíapsi kaa al-leetuay huaka kaa tühuata jume yoremem joäü bíchaka éntok huaka nokta kaa türik jíkkajaka. ⁹Jü Señor jita juénarata bétana júne huame tü yóremem ára jínëu, jume juéna yóremem éntok am ërianake jiokot máchiraata am bínnaakè béchíbo áman taahuata nokta ámet chúpanakeu yúmayo. ¹⁰Chè júne siroksi machisi ámeu huéenake huame takahuata bétana huémta guojaasemmehui, huame takahuata jita ukulëpo áman kateme, jaiti máchiraata boojoriame, éntok huame Señorta yäura kaitäpo bíchame.

Ímëi kaabeta jáchin ériaka yäurata béj-reka aane, kaabetam májhueka huame yörisi machisi néshuemmet jájana jiaahua.

¹¹Huame Diosta ángelesim chë útteaka éntok chë néshueka junne kaa béttesi nokta ámet jíjímma, Señorta bíchäpo.

¹²Tè ímëi yoremem hua kaa bem át júneäubet júne juénasi nokame, huame animal kaa júneame súa béchíbo yeu tómtílamtaka mámpo jípuhuame bénasim jum bem kaa tühua yáarimmak kókkkonake, ¹³hua kaa tühua bem yáari béchíbo béjhuata mabetak, béjasum chíkti táapo huaka kaa tühuata bem jonakeu müsäule. Ímëi ínel jume jaiti mamachim, éntok máncham, enchimmak jíbuäka júnen jíba kaa tühuata boojoria, éntokim jíba emo al-leetua.

¹⁴Bempo kía jíba jume jáamuchímmet pupujte, katim íchakte juénarata joaka, huame géntem kaa bem jíapsi tútti jípureme náyote. Bem jíapsi jita chíkti huáatiaubet jóyhuala, éntokim kaa tühuata násuk usiarim. ¹⁵Huakam böota lútula huémta tójaka täbuikut kaate, jú profeta Balaam jú Beorta üusi böochi, huäri huaka juénaraata béjhua chë nákkkek. ¹⁶Tè béttesi nokta jíkkajak kaa tühuata ä yáakä béchíbo; bueituk jú animal kara nokame ä püaateme yorem ténasi áu nokaka hua profetata kaa súara ä yáa bárëu táktiak.

¹⁷Ímëi kía jume pozom kaa bäakame bénasi mamachi, namuta buere jékata huéria

bénasi mamachi; áme béchĭbo hua tua kaa máchira náikiari jíba béchĭbo. ¹⁸Bueitukim buéresi kaita béj-remta nokaka takahuata ukulëubei ámeu bíchaa am huiike, huame jĭob-lataka kateme tua tóij-lame én jübua jíapsi kúaktilame. ¹⁹Búttiataka bem jíapsinake tíakam ámeu nooka, të bempöisu jü kaa tühuata bétuk emo jípure. Bueituk kía jábe júne úttearäpo kobahuak hua ä kobakamta bétuk áu jípunake. ²⁰Tua lütüriapo bempo hua juénaraata ím ániapo ayukamta bétana áma yeu sákalataka, juka Señor Jesucristota, juka yore jínëumta, bem täyaka béchĭbo, éntokim júchi áma emo kuuriakätek emo nénkilamtaka tahuanake. Huanäi hua ámeu huéenakeme chë júne jĭokot machinake bannaataka kee bem ä tátäyäpo béppa. ²¹Bueituk chë türi éiyey áme béchĭbo juka Jesucristota tü noki kaa täyako, ä täyasulataka éntok júchi bem amáu nóttëpo béppa, juka Diosta nésahui bem téjhuahuakau tójaka. ²²Të hua noki tua lütüriata jiäpo ámanim aane, hua ínel jíame: “Huä chüu júchi ä bísachi buäye, kohui éntok úbataka júchi techoapo áu bíaktia.”

*Jü taahuari Señorta át
yebijnakeu yúmanake*

3 ¹In nákhui, ĭri jü jíösia guosa huëpo ín enchimmeu jĭojtëhui, éntokne náhuichimpo enchimmeu nokaka enchim bússa enchim jítäu huáatinakë béchĭbo, ²huame santo profetam jauhuey

nok-läu enchimmeu huáatinakë béchĭbo, éntok hua Señor itom jínëukamta nésahui apóstolim itom téjhuakaubehui.

³Íkái bát jüneriaka, bueituk jume taahuarim äbo huéenakemet yore junnerianakeme yáijnakëhui, bem takahua jita ukulëpo áman jíba kateka, ⁴ínel jíaka: “¿Jáchisu yeu siika jü júchi ä yebijnake bétana ä nokakähui? Bueituk huame itom áchayim kókkoka taahuarit naateka síme jíba bénasi huéiye, ániata jünaktehuakapo naateka én tájti.” ⁵Ímëi ínel jünaktekam kaa ä jüneria báare, juka téhuekata Diosta ínel jíakä béchĭbo yáatukähui, éntok juka buíata báatukai bétana éntok bäy ä jiapsähui. ⁶Huä béchĭbo, jü ánia bannaataka huéeme buéria baniay lütek. ⁷Të jü téhueka éntok jü buíya én ayukame Diosta éäpo bëri hua taahuari nokta ámet chúpanakepo tájti, tájĭay ä luutinakë béchĭbo, chíkti juëna yórememmak náuhui.

⁸Të eme nákhuame, íkarem jüneria: jü Señorta béchĭbo jü senu taahuari senu mil huásuktiriata bénasi maachi, éntok senu mil huásuktiria júne senu taahuata bénasi maachi áa béchĭbo. ⁹Jü Señor kaibu ä surujtianake, huaka taahuata ä noki chúpa béchĭbo huatem éá bénasi, ál-la símem boobícháihui, taahuarim itom réuhasimeka, kaabeta áu tärü íaaka ál-la símem emo jíapsi kúakti íaaka.

¹⁰Të hua taahuari Señorta át yebijnakeu yúmanake huaka

lak-ronta ják tukaapo yepsakäpo bënasi; huaachi taahuarit jü téhueka luutinake mausi buére kusisi jáka, síme hua jikat ayukame béetisuka kaitäpo tahuana, jü buía entok síme hua át ayukame két táatunake.

¹¹Íkai síme ayukamta kaitäpo tahuanakey, jáchisu enim kaa Diostau huáateka tülisi emo nüyeka jíapsinake, ¹²boobíchaka éntok emo bamijtuaka huaka taahuata Diosta yéchari yúmanakeu béchibo, hua taahuarit juka téhuekata béeteka kaitäpo tahuanakeyo, éntok hua áman jikkat ayukamta tájaka ä kájoktinakeyo. ¹³Të ítapo ä boobíchaïhui áapörík júnen jáká béchibo bemela téhuekata, bemela buíata, huam tühuata jonäpo.

¹⁴Huari béchibo, eme nákuhame, íkai boobíchaka tuem chíkti enchim jíapsimak át tekipanua kaita juënarata enchimmet téunä béchibo,

éntok áapörík bétana kaita nokta béttesi machik enchimmet ä jákkaijnakë béchibo, yánti jíapsaka. ¹⁵Éntokem kaa ä koptia, Señorta símem jínëu báreka lauti itom ä huériähui; jü hermano Pablo itom nákehui itou jiojtekä bënasi, súahuata ä mikhuakapo ámani, ¹⁶síme ä jiojteri jëlaimpo fári bétana nokaka; huame násuk obiachi ámet jünee béchibo, huámëisan huame kaita tua täyame éntok náuhui éame am nánayote, két huame huate jiojterim junne, bempöisu kaa tüüsi bem emo tahuanakë béchibo.

¹⁷Júnëlituk eme, ín nákehui, bát íkai jüneriaka, emoem suaya, jáchinai júne jume juëna yóremem enchim bätähuak hua enchim óusi eäu kóm huéenake. ¹⁸Al-lem yötu jum tühuapo éntok itom Señor Jesucristota, itom jínëukamta, täyahuäpo. Áapörík béchibo síme ujoyória näikiatunake, èni éntok jíba béchibo. Júnentunake.